

Durante congreso tocante cuidio di adiccion

Testimonio di un ex adicto: Hubentud, scucha e mensahe di hendenan cu experiencia!

Aplauso di sosten y motivacion pa Astrid Tromp

ASTRID Tromp ta bin di un famia grandi, ehemplar y respetu, el a studia, e ta un persona cu multiple talento y tabata gusta participa na concursosnan di beyesa. Astrid Tromp ta un ex-adicto. Su rehabilitacion a dura 2 aña y 3 luna y e ta "clean" awo pa 2 aña y 7 luna. El a conta su testimonio durante e congreso tocante cuidio di adiccion, organisa pa Minister Dr. Richard Visser y e fundacionnan trahando riba prevencion di adiccion.

Durante e congreso di tres dia cu e tema "verslavingszorg" o sea cuidio di adiccion, hunto cu Audrey Croes-Lacle di fundacion Adopt-An-Addict, Astrid Tromp a splica su historia cu adiccion. Na un manera sincero, trankilo y profesional, Astrid a comparti su experiencia; di su prome slok di alcohol, tur cos cu el a perde pa motibo di su adiccion cu a bira pio ora el a cuminsa uza cocaina y su proceso di rehabilitacion.

Astrid Tromp a conta cu su prome encuentro cu un substancia adictivo tabata na un fiesta di su scol secundario ora cu e tabatin 13 aña. El a sinti hopi bon ora el a purba su prome slok di alcohol. Eynan su bida como adicto a cuminsa, pero nunca el a laga esey molesti'e pa

cumpli cu e motu di su famia, cual tabata pa studia y bira un persona util den futuro.

Astrid Tromp tabatin talentonan fantastico, segun e mes a conta, e tabata gusta participa na certamen di beyesa y di carnaval, e tabata activo den deporte, tabata toca cuarta y tabata studia bon. El a gradua como "Maatschappelijk cultureel werkster" y ta mama di dos yiu muhe, pero alcohol a sigui importante den su bida. E ta conta cu el a keda un tempo su so pa cria su dos yiu y aunke e sa cu e no tabata e miho ehempel pa nan como mama, e ta orguyoso cu nan a crece, studia y awor tin un bon futuro.

Astrid a expresa cu e tabata un persona agresivo, dificil, impulsivo y tabata kere cu mundo mester acept'e manera cu e ta. Na edad di 38 aña, Astrid a purba cocaina pa prome biaha y di eynan tur cos a cuminsa bay atras den tur aspecto y el a perde su trabao, su cas, su auto y loke tabata mas importante p'e, cual ta e apoyo di su famia.

A pesar di tur cos, Dios nunca a lag'e na caya y el a scucha su plegaria, Astrid a conta. Su mama y rumannan a acerca Adopt-An-Addict y Audrey a haci'e



un pregunta simpel; si e kier su bida bek. Astrid no a duda y a contesta mesora cu "si". Cu cariño den su voz, Astrid a conta con e ta corda con su famia a percura p'e y a cumpra paña y su pasashi pa e bay Hogares Crea na Santo Domingo.

Segun e experiencia di Astrid Tromp, Hogares Crea tabata e luga ideal p'e, como cu e ta e unico institucion den Caribe cu ta traha cu e personalidad di e persona y yud'e cambia su actitud. Astrid a considera esaki su miho opcion y a splica cu pa via di su caracter y personalidad tabata hopi dificil pa nan traha cu n'e como individuo.

Normalmente un tratamiento

di un adicto ta dura 1 aña y 6 pa 8 luna, pero e rehabilitacion di Astrid a tuma 2 aña y 3 luna. Pero na final di dia e ta sumamente contento cu na Hogares Crea nan a siñ'e instrumentonan esencial, cual ta con pa cambia su caracter negativo pa positivo y con pa combina su temperamento cu su talentonan.

Astrid Tromp ta conta cu e ta puntra su mes ta con e por a tira su hubentud afo y destrosa su bida. El a expresa un plegaria dirigi cu enfasis y emocion den direccion di nos hobennan pa nan scucha e mensahe di hendenan cu experiencia. "Prome cu bo sa bo tin 50 aña y si bo

no a studia, con bo ta kere di por sigui padilanti?" Astrid a subraya.

E sala a biba cu e storia di bida di Astrid y a dun'e un aplauso largo como muestra di sosten, apoyo y admiracion ora cu el a bisa cu e ta "schoon" ya pa 2 aña y 7 luna, cu e tin su bida bek y ta funcionando optimal, liber di adiccion.

Astrid ta gradici cu comunidad di Aruba a acept'e atrobe como un persona productivo, como tambe el ta gradici Dios, su famia, Adopt-An-Addict, Sra. Audrey Croes-Lacle y Hogares Crea pa yud'e supera su adiccionnan.

Conferencia riba "Cuido di Adiccion" tabata exitoso

Jan van der Straten: Nos ta wak cu nos ta bon bezig na Aruba

DESPUES di tres dia di presentacion, sesion y lecturanan, e consehero di Minister Dr. Richard Visser pa asuntonan di adiccion, esta Sr. Jan van der Straten a conclui cu: "Nos ta wak cu nos ta bon bezig na Aruba". E salanan tabata yen te na e capacidad maximo, tur e organisacionnan cual ta ofrece tur e tiponan di ayudo y asistencia pa adiccionnan tabata representa y entre varios organisacion ya a haci afspraaknan informal pa e trayecto y procesonan cu ta bay sigui awo.

Tabatin un cantidad di resultado durante e congreso y algun aspecto a wordo treci padilanti cu mas peso cu otronan.

"Esaki tabata un bon congreso y nos lo probecha di e frutonan di dje tambe den futuro," Sr. Van der Straten a bisa.

Asina ta premira cu sigur e organisacionnan cu interes, reto y metanan comun lo keda den contacto y cuminsa expande riba e contacto cu a wordo estableci durante e congreso. Esaki no ta aplicabel solamente pa loke ta trata e relacion entre nos organisacionnan local, pero specialmente e relacion di nos organisacionnan cu esunnan internacional representa na e congreso, entre otro Parnassia Bavo y De Hoop di Hulanda y Capriles Kliniek di Corsou.

El a splica cu un di e hopi aspectonan cu a

wordo discuti y cu lo wordo adresa proximalmente ta e acercamento cu Minister di Enseñansa cu e peticion pa introduci programanan specifico den enseñansa cual lo yuda nos hobennan para mas fuerte y ta mas resistente pa e tentacionnan di alcohol y droga.

Jan Van der Straten tabata sumamente satisfecho cu resultadonan di e congreso, cual tabatin apoyo completo di Minister di Salubridad y Deporte, dr. Richard Visser y e presencia di Gobernador di Aruba, Sr. Fredis Refunjol

durante e apertura cu sigur a duna peso na e congreso.

E resultado mes di e congreso lo por wordo midi den e follow-up y e desarojo di cuidio di adiccion na Aruba.

